

Prosedur eksport sarang burung walit ditambah baik

BH
18/11/16

Kementerian Pertanian dan Industri Asas Tani (MOA) akan membangunkan mekanisme dan platform dalam tempoh enam bulan dari sekarang bagi menambahbaik prosedur operasi standard (SOP) pengeksportan sarang burung walit mentah belum bersih khususnya ke China.

Menterinya, Datuk Seri Ahmad Shabery Cheek, berkata platform itu membolehkan lebih 10,000 pengusaha sarang burung walit memenuhi kualiti ditetapkan negara pengimport.

Ia juga mematuhi 35 syarat ditetapkan Protokol Pemeriksaan Kuarantin dan Keperluan Kebersihan Veterinar bagi Pengeksportan Sarang Burung Walit Mentah Belum Bersih (RUC EBN) yang ditandatangani antara Malaysia dan China, baru-baru ini.

Pastikan kualiti terjamin

“Langkah itu bertujuan memastikan kualiti sarang burung walit mentah, selain menjamin pendapatan berterusan pengusaha, sekali gus mengelak berulang kejadian sarang burung walit yang dieksport didakwa memiliki kandungan tidak selamat,” katanya pada sesi khas waktu pertanyaan menteri di Dewan Rakyat, semalam.

Beliau menjawab soalan tambahan Datuk Shamsul Anuar Nasarah (BN-Lenggong) yang mahu mengetahui langkah kementerian untuk menggalakkan usahawan terbabit dalam industri burung walit.

Terdahulu dalam jawapan asal, Ahmad Shabery berkata, protokol RUC EBN ditandatangani antara kementerian itu dan



Platform membolehkan pengusaha penuhi kualiti negara pengimport”

Ahmad Shabery Cheek,
Menteri Pertanian dan Industri Asas Tani

General Administration of Quality Supervision, Inspection and Quarantine (AQSIQ) ketika lawatan Perdana Menteri, Datuk Seri Najib Razak ke China, baru-baru ini.

Katanya, pemeteraian protokol itu memberi kesan langsung melalui peningkatan pendapatan pengusaha sarang burung walit selaras dengan peningkatan harga sarang burung walit mentah belum bersih daripada RM1,000 sekilogram kepada RM3,000 hingga RM4,000 sekilogram mengikut gred.

“Pemeteraian protokol itu juga dijangka meningkatkan peratusan eksport burung walit mentah belum bersih dan menyumbang kepada peningkatan nilai dagangan antara Malaysia dan China dalam sektor pertanian,” katanya.